



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Toronto Masters: Taylor Fritz quarterfinals-i iogo

Taoba mapang Jharkhand Chief Minister Shibu Soren süogo

VOL. XXII ISSUE NO. 291 (ADOK 291)

DIMAPUR

SANGTENÜ (TUESDAY)

LUROI (LUROI) 05, 2025

₹ 5.00

Tanü nungi DMCEWU longkak aittsü

Dimapur, Luroi/August 04 (TYO): Dimapur Municipal Council nung mapa inyaktertem nem itasen mapang shidak nung magütsüba, EPF, Gratuity aser danga benefits tem magütsüba aser danga duty balala nung DMC Employees inyakdaksüba asoshi July 24, 2025 nü pangzüng agütsüba nung ajemdaker tang nungi tenzüka mapa meinyaktsü, ta Hombarnü Dimapur Municipal Council Employees Welfare Union (DMCEWU) sangdong ka ajanga ashi.

Aiben temulunglemtsü o shiaka staff aser mapa inyaker nem DMC ajanga itasen magütsüba yong iba telemtetba ya agi.

DMC-i anendaka aliba itasen ajunga magütsü tashi, department

mesüra tesem kecha nung haidr mesüra machinery kata mamshitsü. Iba telemtetba ya lokti-i agi aser senotsü tagütsütsü aliba ajunga magütsü tashi mapa kecha meinyaktsü, ta DMCEWU sangdong ajanga ashi.

Onoki akhangba meinyak tashi August 5, 2025 nungi tenzüka anepdang 9:30 ako nungi nikongdang 4:00 ako tashi Old DMC building, Kalibari Road, Dimapur nung longkak aittsü.

Iba longkak aitba ya non-violent, yimya tajung amshia tzüzüng-ozüing shidak amshia alitsü aser attendance shidak alitsü, aser staffs shirnoksa longkak atiba nung shilem magir, parnok dang senchi achitsü, ta DMCEWU sangdong ajanga ashi.

NU nungi kaketshir 80-i UGC-NET exam ajangtetogo

Dimapur, Luroi/August 04 (TYO): National Testing Agency ajanga agiba UGC-NET examination 2025 nung Nagaland University nung azünger kaketshir 80-i category balala nung qualify süogo.

Kaketshir anati JRF aser assistant professor atema qualify süogo, assistant professor aser PhD nung admission atema kaketshir 28 qualify süogi aser PhD atema kaketshir 50 qualify süogo, ta University ajanga Hombarnü sangdong ka nung ashi.

UGC-NET examination ya academia aser research nung shilem agitsü asoshi temsüa aliba candidates asadangba tatidang tongtipang ka lir.

Higher education aser talisa

tesayur aser scholarly research tetemsü nisung jangjaba nung ibai tongtipang shilem ka lir.

Kaketshir nem tenüngsang agütsüba mapang, item kaketshir temi takok anguba yagi parnoki bendanga agütsüba aser academic excellence sayuba kisüing masü saka academic foundation tashi aitba aser Nagaland University nung research culture adokdaksüba sayur, ta Nagaland University Vice Chancellor JK Patnaik-i ashi.

"Item takok ajanga University-i advanced learning ajungmesoa scholarly environment adokdaksüba aser academia, research aser education nung careers yanglutsü asoshi kaketshir renemtsüba jangjatsür," ta Patnaik-i ashi.

Lenmang raksar aliba ketdangsür temi semdang



MLAs aser district ketdangsürtemi Kohima nung BSF camp anasa lenmang raksar aliba August 4, 2025 nü semdangba mapang tangokba noksa ka yangi angur.

Dimapur, Luroi/August 04 (TYO): MLAs Kevipodi Sophie aser Dr. Tseilhoutuo Rhutso den Deputy Commissioner, Kohima, B. Henok Buchem, NCS; Additional SP Kohima, Soriso Quinker, NPS aser danga sorkar ketdangsür temi August 4, 2025 nü Kohima nung BSF camp anasa lenmang kanga sashia raksar aliba semdanga liasü.

Gari tulutem tanen makai senzüba ajanga iba lenmang nung gari mesenzütettsüa akumba ajanga ketdangsürtemi semdangtsüa akum. Iba

mapang parnoki tsüngtong oa tensa asadang aser tekeraba nung lenmang yanglushitsü asoshi mera balala agitsü atema sensaksema liasü.

Iba lenmang nung gari senzütettsü aser anogoshi senzüsempongertem timtem makai senzütettsü asoshi tekeraba nung mera agitsü, ta ketdangsürtemi ashi.

Tarutsü nung iba lenmang tamajungba mekumdaaktsüi nokdangtsü asoshi ketdangsürtemi lenmang balala bushiba mapang lir.

Asüing cabinet-i reservation policy nung telemtetba agitsü akok



5 Tribes CoRRP ketdangsürtemi August 4, 2025 nü Civil Secretariat, Kohima nung state Chief Secretary tasenba, Sentianger Imchen, IAS (tiyong) den ajurutepdang tangokba noksa nung angur.

Kohima, Luroi/August 04 (TYO): Nagaland indang job reservation policy reprangshitsü akhangba dak sendakba nung State Cabinet ajanga Bodhbarnü telemtetba ka agitsü amai lir ta osangtem ajanga ashir.

5 Tribes CoRRP convener Er. Tesinlo Semy aser member secretary GK Zhimomi nati Hombarnü sangdong ka agütsüba nung, state indang Chief Secretary tasenba, Sentianger Imchen-i parnok tanü jaoka Chief Secretary's Conference Room, Civil Secretariat, Kohima nung senden ka amenba mapang iba osang ya lemsatep, ta ashi.

5 Tribes CoRRP ya Ao, Sumi, Lotha, Rengma aser Angami kin temi tentetba lir aser state indang job reservation policy lepa reprangshiang ta akhangtsü asoshi tentet.

"Iba senden nung takhangba tongtipang onük aser tang tashinung State sorkari telangzüba agüja aliba indang tongmelang agi sensaksema liasü. State Cabinet senden ka

August 6 nü amentsü aser iba mapang hopta ana tsünga Commission tentettsü aser Terms of Reference yanglutsü densema takhangba agüja aliba nung telemtetba agitsü ta Chief Secretary-i metetdaksü," ta sangdong ajanga ashi.

Tamang katettsüa yamaji ashiba yong, state sorkari mepishiba ama phase tasembuba longkak aittsü aliba khen asoshi thinena atatsü 5 Tribes CoRRP-i mulungtepogo, ta parnoki ashi.

Kin pongu sanger kübok 5-Tribes CoRRP ajanga state sorkar nem joint memorandum ka agütsüba sülen Nagaland indang reservation policy reprangshitsü tali asendenshia arur.

Iba policy ya 1977 nungi amshia arur aser iba ya tang state nung loktiliba, rongsenketzüng aser shisaliok tensa den mapeter, ta parnoki ashir.

Parnoki akhangba ama inyakdaksütsü ajungshia Committee yagi anaben longkak aita lir - mezüngbuba May 29 nü

district headquarters balala (Dimapur, Kohima, Mokokchung, Wokha, Tseminyu, Zunheboto, Chümoukedima, Niuland) nung longkak aita liasü.

Tanaben July 9 nü Kohima nung Civil Secretariat kima longkak aita liasü, kong kin pongu nungi tanur-tain aser tetsür-tebur nisung meyririjang aika pei kin sübotsü sübor adenshia liasü.

Mezüngbo küm ter asoshi kin tenet atema non-technical aser non-gazetted posts tem shilem 25 wazüka yuja liasü. Shisaliok aser rongsenketzüng tsütsü jenjang tamajungba nung aliba aser state mapa nunga nübu tajemba aliba nung ajemdaker item kin ya 'backward' ta nüngja agütsü.

Yamajisür arudang sorkar mapa nung menden wazüka yutsüba ya shilem 37 akum, koba Eastern Nagaland Backward Tribes asoshi shilem 25 aser state nung danga backward kin pezü asoshi shilem 12 yutsü.

Nagaland Foothills Road ochishia yanglutsü pangzüngtep

Dimapur, Luroi/August 04 (TYO): Nagaland Foothills Road Coordination Committee (NFHRCC) ajungben senden ka August 4, 2025 nü Committee Base Office, Kher Mahal Dimapur nung amendang, Chief Minister, Dr. Neiphiu Rio lenisüba kübok Nagaland sorkari Trans Nagaland Expressway (Foothills Road) ken o temaba jenjang nung bener nokdakba asoshi pelaba lemsatepa liasü.

Sorkari iba ken o maneni August 7, 2025 nü jembitsü asoshi Foothills Road ajanga aoba district tem nungi Apex Tribal HOHO aser assembly constituency nungi local MLAs tem jaokba asoshi pela agizüker, saka danga Tribal HOHO aser district tem indang MLAs aser Committee mejaokba asoshi temulung masüba lemsatep, shirnoki Nagaland Economic Survival Road atema 2013 nungi ozüing yanglurtem dena stakeholders balala den iba khuret lemsatepa arur, kong NFHRCC ajanga teti asen state telungzüik nung ajak sendaktepa lenmang

tajung yanglutsü asoshi meranga jembishinüa arur.

Foothills Road Project dak sendakba nung non-state actors mesüra CSOs shinga-ia Contractors firms mesüra Department dang saru memeshitsüla ta tamalen nungi nokdaka aruba nung akangshia nokdaksü iba senden nung pangjemshi. Committee-i tongtipang NNPGs teloktem den angatettepa, tamang katempa aser kati ka akumtsübotepa iba lenmang yangluba nung saru memeshitsü 2013 küm züngzüktepa lir, aser kasaji tang aliba factions temia inyaktsüla, ta iba senden nung jembi.

Tang teyangludak Foothills Road nung Committee nem contract mapa pezü agütsüogo ta nüburtem dang nisung kari, talisa Baghty Division EE, PWD (R & B) ajanga osang prokshiba anentsüla. Firms atema recommendation agütsütsü Department-i asüngdangba ama M/S 3S Infra Ltd, (Earth Cutting Works), Tuli Division; M/S P.Mha-Tum & Co.(Bridge),

Baghty Division; M/S C/o NCSU c/o M/s Pelle Keizhe, (Bridge) Baghty Division aser M/S Quinker Enterprise, (Bridge) Baghty Division nem Committee ajanga endorsement agütsü aser kasaji Nagaland nung osangkaket aser electronic news channels nung March 12, 2025 nü prokshioigo aser tanüa kasa tangatetba nung lir, ta ashi.

NPWD, R&B, Contractor's Firm aser Committee külemi joint inspection ka magi tashi bill magütsütsü ta Department den March 5, 2025 nü MOA zülutepa aliba ama mesü joint inspection mao M/S Onkho Construction and Suppliers aser M/S Shangphoh Konyak nem ashikülak mapa inyaka sen 3 crore shi agütsüogo. Iba yimya ya maneni inyakra, Divisional Engineers temi Nagaland nung otsüsütsü tesendaktep lenmang indang project aoyi kumtsür asütsü. Anungji Division nung ketdangsür temi iba project ya lenmang ajaklen ochishia inyaktsüla, ta senden nung pangzüngtepa liasü.

NU nung Language & Culture nung Interdisciplinary MA amenokogo



Dimapur, Luroi/August 4 (TYO): Nagaland University nung Language and Culture dak sendakba nung Master of Arts programme ka amenokogo, koba interdisciplinary Master's degree ka asütsü.

Naga kin oshi balala aser sobaliba wazüka ayutsü, ajungketsü aser tejakleni bener aotsü atema mapang shitak nung iba sentong ya tenzükogo.

Iba course ajanga kaketshirtem nem discipline ka dak dang rangloker masü saka lenla balala nung course mesüra curricula tem angazütsü aser

bushitsü atema maongka agütsütsü.

Kaketshirtem shirnok iba programme nungi graduate südir parnok Linguistics, Folk Literature aser Tribal and Regional Language ta paper asem nung NET tatidang agütsütsü.

Mezüngbuba batch ya 2025 küm August 5 nü nungi tenzüktsü. Iba program atema kaketshir 20 anioktsü.

Iba clurse ya Centre for Naga Tribal Language Studies-i agütsüba lir aser iba ya four-semester interdisciplinary programme ka asütsü.

Career atema maongka dak sendakba nung iba programme yagi kaketshirtem nem, bushisüngdang, tesayur, digital archiving, consultancy, development sector professionals, language planning aser policy analysts ama inyaktü atema maongka agütsütsü.

Iba sentong benokba ajanga Nagaland University, kaketshisatsü bushiba nung temaba jenjang atongtsü, shinga sentoka metoktsütsü aser indigenous knowledge system tem tejakdangi bener aotsü bendanga agütsür aliba sayur.

Dr. Kekhrielhoulie-i kin balala oshi wazüka ayutsü nüngdakba lemsatop

Kohima, Luroi/August 4 (TYO): Advisor for School Education and SCERT, Dr. Kekhrielhoulie Yhome-i, Nagaland nung kin balala oshi wazüka ayutsü nüngdakba lemsatopogo.

Nagaland University Kohima Campus nung oshi balala sayurtem atema anogo 7 Refresher Course ayongzüka

agiba lapokba sentong nung o jembiba mapang pai, tezüluba nung script maliba kintem atema maitü aser oshi wazüka ayutsü kanga tongtibang lir, ta ashi. Dr. Yhome-isa, Nagaland amala oshi aika jembiba state nung oshi wazüka ayutsü koda tebenja lir iba indang lemsatopa liasü. Pai ashiba agi, oshi meyipzüksüba tebilemtsü densema tetsüdaoktsü

balala aliba ajanga Department-i kin balala indang oshi textbook adoktsü asoshi benoka inyakba inyakyim tang tashi tetenzük nung dang lir.

Pai, National Education Policy den peta tanurtem dang tetsü oshi sayutsü koda tongtibang iba indang lemsatopba saka iba ya benoka inyaktü kanga melarabo masü ta ashi.

Jorhat nung alir Aortemi Tsüngremmung benjong ayongzüka among



Jorhat nung alir Aortemi Tsüngremmung benjong ayongzüka amongba sentong nung tongti tesemdang Hon'ble Speaker of the Nagaland Legislative Assembly Shri Sharingain Longkumer-i jembir aser lanurtemi yartsüngsang nung shilem agiba mapang nung tangokba noksa.

Mokokchung, Luroi/August 04(TYO):Jorhat nung alir Aortem aser Eastern Theological College nung azünger Aotsür Aortem külemi semtepa ayongzüka Jorhat nung alir Aortem ajak adenshia Eastern Theological College, Jorhat nung August 2nü T s ü n g r e m m u n g benjong "Celebrating Culture, Building Community," omen nung ajemdaker kanga dang longjem longjema aser longsotepa mongogo.

Iba Tsüngremmung bejong sentong yaHon'ble Speaker of

the Nagaland Legislative AssemblyShri Sharingain Longkumer-i akhüm agüja tongti tesemdang ka ama aden.

Sentong nung tongti tesemdangeri jembidang bejungmong ka ajanga pelatapa longsotepa amongbaji kanga tongtipang aser ibaji ajanga sobaliba tajung angazükteper aser ano iba den külemi asenok tsüngda telongjem akangshiteper ta lemsatop.

Tongti tesemdangrisa Naga lima atena or alirtemi pei sobaliba mamai benshia amongbaji kanga dang tobur tajung aser ya ajanga

Naga nung jenjang tali dang ajungketer ta tepelaba olen lemsatop.

Kasa sentong nungsa tetushi tejaoker Rev. Dr. Prof. Razouselie Lasetso, Principal of Eastern Theological College-i tayongzüka o tatsüka jembia, Ao kin ten ng nung salem osangMr. Imotemsu Ao, IFS aben aser sobaliba kenten menu,yartsüngsang balala agiteper aser Tsüngremmung bejong tenüng nung telok ajak Aor chiyungtsü chiyungtepa Tsüngremmung benjong kanga dang takok ngua among.

August 5 nü Education Sensitization Campaign agitsü

Dimapur, Luroi/August 4 (TYO): Chumoukedima Deputy Commissioner, Polan John, NCS-i sangdong ka ajanga, Investment and Development Authority of Nagaland (IDAN)-i ayongzüka August 5 nü DC Conference Hall, Chumoukedima nung 'Education Sensitization Campaign' ka agitsü, ta metetdaksüogo.

Iba campaign ayongzüka agiba nükjidongji, sorkar aser jurila inyakyim kübok Scholarship Scheme tem, Under Graduate (UG) & Post Graduate (PG) programs; Technical, Vocational, Health& allied Courses; BBA aser MBA amala Professional program tem dak sendakba nung kaketshirtem atema maongka balala aliba indang metetdaksütsü asoshi lir.

Iba sentong ya talisa tawa Class 12 pass sür aliba kaketshirtem shirnok JEE/NEET agütsüogo saka admission monguteti ali, aser graduate sür aliba kaketshirtem shirnok PG jenjang nung kaketshisatsü maneni bushitsü tebilemba ali parnok asoshi lir.

Iba sentong nung shilem agitsü jangraba kaketshirtem aser stakeholder tem dang jangrabangra arua shilem agitsü metetdaksüogo.

Maneni Chumoukedima district kübok kaketshir lokti tentet ajak, Arogo tem, riju balala, NGO aser lokti tentet balala dang iba osang ya kaketshirtem aser tsürapurtem nem metetdaksütsü aser sentong nung shilem agitsü nisungtem shimer yoktsü mepeshia metetdaksüogo.

MJC nung Freshers Social 2025 agiogo



Dimapur, Luroi/August 4 (TYO): Jubilee Memorial College-i ayongzüka July 31 nü Aongza Ki nung Freshers' Social 2025 mungogo. Iba sentong ya "The Beginning of Becoming" omen nung ajemdaker agia liasü. Iba sentong nung kaketshir tasentem pelashishia agizüka liasü.

Sentong nung tajungshi o jembiba mapang Principal Dr. Imtiwati Jamir-i, aruba, tetenzük aser kümyonga aoba indang jembia. Paisa, taküm nung yimyayimpong azüoka

alitsü, khuret angateta inyaktü aser renloka aotsü koda tongtibang iba indang lemsatop. Iba sentong ya Youth Mentor, MTBA Imliwati-i sarasademer tembanga liasü.

Sentong nungsa taoba Mr. & Miss Fresher 2024 na sentong nung shilem agir tangartemi meiner tatembangbuba sabang nung jaja-a liasü aser Liju Achumi-i musical performance ka agütsü. 2025 küm atema Mr. Watilong Aier aser Ms. Takanungla na Mr & Miss Fresher 2025 shima liasü.

Lotha Hoho-i sorkar nem temepishiba agütsü

Kohima, Luroi/August 4 (TYO): Lotha Hoho-i, state sorkar dang shiti agi nüburtem minprongba ya bentettsü asoshi takaratiba nung jenjang tapet agitsü mepeshia metetdaksüogo. Tawa Wokha kübok New Riphym yimtsüng nung arishi küm 72 tain aluyimer ka shiti agi tepsetba sülen iba temepishiba ya agüja liasü.

Hoho-i, lendong agi kongshitsü ana nung aliba

tesemtemi rapid response team tem yoktsü aser early warning system tem amenoktsütsü mepeshia metetdaksüogo. Parokisa, iba tebilemtsü ya teti atema bentettsü asoshi lokti dak amendaker tasatem yanglutsü nüngdakba lemsatop.

Maneni Hoho-i, asür kibong nem teyari agütsütsü aser arem shiruru agi kongshir aliba kibongtem nem mapang talangka asoshi teyari agütsütsü takhangba agüja liasü.

Taoba mapang Jharkhand Chief Minister Shibu Soren süogo



August 04, 2025 nü New Delhi nung aliba Sir Ganga Ram Hospital nung Ato kilonser, Narendra Modi-i taoba mapang Jharkhand chief minister Shibu Soren mangjak nung asür nem akhüm agütsüdang tangokba noksa nung angur. Kasa noksa nung Shibu Soren'er jabaso, Jharkhand Chief Minister Hemant Soren-a nokdaka anur.

New Delhi, Luroi/August 04 (Agencies): Taoba mapang Jharkhand chief minister Shibu Soren mapang talangka shiranga aruba sülen Hombarnep süadokogo; pa arrshi küm 81 liasü.

Hombarnü Ato kilonser Narendra Modi-ia Delhi nung aliba Sir Ganga Ram Hospital semdanga asür nem akhüm agütsüogo.

Ato kilonser Modi-i hospital nung Shibu Soren'er jabaso Jharkhand chief minister Hemant Soren den par kibong züngsemtem ajurua mangyim lemsatop.

Tesülen Modi-i X ajanga, "Shibu Soren nem akhüm agütsütsü atema Sir Ganga Ram Hospital-i ao. Par kibong züngsemtem ajuruogo. Ni Hemant, Kalpana aser Shibu Soren meimertem atema sarasademtsür," ta metetdaksü.

Ato kilonserisa, "Shibu Soren ya nüburtem tenzüka aruba sülen yimten lenir aküm. Pai talisa tribal nüburtem, sensakertem aser meshimejungertem nem tashi agütsütsü atema inyaka

aruogo. Pa asüba ajanga jashir. Par kibong züngsemtem aser pa meimertem atema sarasademtsür. Jharkhand CM Shri Hemant Soren den jembiogo aser mangyim jashi lemsatopogo," ta metetdaksü.

Linük Tir, Droupadi Murmu aser Jharkhand Angh, Santosh Gangwar natia asür nem tetushi agütsüba den külemi mangyim jashi lemsatop.

Murmu-a Sir Ganga Ram Hospital tsüngdong oa asür nem akhüm agütsü.

Shibu Soren ya taküm June 19 nungi hospital nung treatment agi tenzüka liasü aser Hombarnep 8:56 ako nung asü.

Par jabaso Hemant Soren-i X ajanga, "Asenoki akhümtsüba aliba Dishom Guruji-i asenok ajak toktsüogo. Tanü ni tazüngla kümogo," ta metetdaksü.

Asür nem akhüm agüja tang tagidak Jharkhand Assembly senden thinenogo aser state sorkari anogo asemnü mangyimtsü sangdongogo.

Jharkhand BJP Tir, Babulal Marandi-i, "Shibu Soren ya yimtenren lenir ka dang masü saka loktiliba nung temelenshi

adokdaksür ka liasü. Pa lanur asüdang pai sen aputsürtem anema crusade ka tenzüka liasü aser pa leniba nung yi nokdangtsü atema nokdak. Item mapatong ana nung nüburtem aikati pa nungita liasü," ta metetdaksü.

Congress lenir aser taoba mapang Jharkhand Congress Tir, Rajesh Thakur-i, "Jharkhand state tentetba nung Shibu Soren-i tongti shilem agia liasü. Pai sensakertem, Dalit nungertem aser state nüburtem atema nokdak. Tanü pa asüba ajanga Jharkhand state-i takoksa tulu nguogo," ta metetdaksü.

Taoba mapang Jharkhand Chief Minister, Raghubar Das-i, "Guruji' ya kübu amai liasü. Ni pa dang nungi aika angazükogo. Pai aniba cabinet nung ni-a minister ka liasü. Pai takoksa angurtem aser tribal nüburtem atema nokdak. Pai tongmelang taküm ali. Pa teti biletettsü," ta metetdaksü.

Tasümanngi Jharkhand yimtiba, Ranchi-i bener arua Assembly nung khen ayuba sülen par yimdak, Nemra-i bener aotsü.

ECI-i Tejashwi Yadav dang EPIC number tejangja meshir

New Delhi, August 04 (Agencies): Election Commission of India (ECI)-i shidi ka ajanga Bihar assembly nung opposition lenir, Tejashwi Yadav dang pa indang Electors Photo Identity Card (EPIC) number tejangja agüjang aser tanabuba card agüjang ta tuyuogo.

Honibarnü Yadav-i, Bihar

draft electoral roll nung pa tenüng mali, ta sangdonga liasü, iba sülen ECI-i, Rashtriya Janata Dal (RJD) leniri tiyazü jembir ta metetdakja Yadav tenüng aliba draft roll metetdaksü.

Yadav-i, yaküm Lok Sabha election nung vote agütsüdang pai EPIC number RAB2916120 aliba Voter ID amshia liasü,

ajisüaka tang sangdongba draft roll nung ibaji mali, ta ashi. Ajisüaka ECI list nung Tejashwi Yadav tenüngji EPIC number RAB0456228 nung lir.

Tejashwi ya Digha Assembly nung voter ka lir, ajisüaka tang state assembly nung pa mendenji Raghapur Assembly nungi lir.



August 04, 2025 nü Hyderabad nung Telangana Jagruti Tir aser MLC K. Kavitha-i backward nüburtem atema reservation shilem 42 takhangba agüja ghonda 72 lumia longkak aitba mapang lai osangbenertem den jembidang tangokba noksa nung angur.

Tatong Tir election 16 nungi election 4nungbo tetokteper maliasü

New Delhi, August 04 (Agencies): Tang tashi nung India nung tatong Tir election 16 agiogo aser iba nungjagi election pezü nungbo tetokteper makai takok ngua liasü.

Tetokteper makai takok anguba election pezü nungjagi election asem nungbo candidate kar nomination papers nung tashishitsü aliba agi liasü aser tanüngba election kabo tetokteper maliba agi liasü.

Tatong Tir election nung anaben tashi nung tetokteper mali takok angusangji S Radhakrishnan lir (1952 aser 1957 küm). Pa dak alia tatong

Tir election ana nung tetokteper makai takok angur anaji Mohammad Hidayatullah (1979 küm) aser Shankar Dayal Sharma (1987 küm) na lir.

Taoba hopta Jagdeep Dhankhar-i pa temang manemi dang aliba kuli nung ajemdaker ajungbena tatong Tir menden nungi anenogo.

Linük tatong Tir election atema nominations tatembangbuba anogoji August 21 asütsü aser September 9 nü election agiba sülen kasa anogo nungjisa election agiba osangji sangdongtsü.

India map nungi Himachal Pradesh samatsüa akok: Supreme Court



New Delhi, August 04 (Agencies):

Himachal Pradesh nung anentsüh aser tzümetsüng lendong kanga bulua atalokba dak sendakba nung Supreme Court-i Himachal Pradesh sorkar aser Centre sorkar naprongla dang tzü-mopung lendong ataloktsüsa meimchirtemi inyaksangshiba ajanga iba state samatsüa akok, ta metetdaksü.

Supreme Court-i, Himachal nung tensa tamajungba dang akümer, ta metetdaksü.

"Meimchirtem inyaksangshi den külemi tsüngsang-mopung ajanga tesüiba küm aika iba state nung lendong aika ajangshio. Taküm-a tzümetsüng aser anentsüh lendong nung nisung noklang aika süogo aser kiojen meyirjang aika raksatsüogo. Himachal Pradesh nung meimchirtem inyaksangshi ajanga alima tzü-mopung-a mepelar," ta Justices- J. B. Pardiwala aser R. Mahadevan nati akümba bench-i metetdaksü.

Himachal state sorkar Department of Town and Country Planning (TCP)-i Shri Tara Mata Hill ya 'green area' ta sangdonga kiojen tasen asüba nokdangba anema private company, M/S Pristine Hotels & Resorts Pvt. Ltd.-i temepishiba ken o ka benoka liasü, ajisüaka Supreme Court bench-i iba ken oji magizük.

State nung pei sünütsü süa kiojen sütepba, highway ulushiba, hydropower projects amenokba, tunnels atuba aser arem tulu chidokba aija Supreme Court-i, state nung lendong balala atalokba atema Himachal Pradesh-i tzü-mopung nem dang tai metongloksütsüla, ta metetdaksü.

Supreme Court-i, "Anentsüh aluba, kiojen chirepba aser gari lenmang anenpoka aibaji tzü-mopung tai ajanga masü saka meimchirtem tai ajanga lir," ta metetdaksü.

"Tang tashi inyaka aruba ama maneni inyakra iba linük map nungi Himachal Pradesh ya samatsü mapang menoa mali," ta SC-i metetdaksü.

Supreme Court-isa, state nung average temperature teimba dang atur, rürjep alaba ya akhi ama masü aser tsüngsang mopung kanga melenshir, ta metetdaksü.

Court-isa, Himachal ya ali nungi adokba rongsen jenti aliba state ka lir, ajisüaka rongsen atema tali merumeroa inyakba agi tzü-mopung lendong ataloker, ta ashi.

"Himachal Pradesh ya tepor tajung lima ka lir. Tenem aika lir aser mopung tanep asüba agi bendanger raliwalirtem aika puar. Tourism ajungkettsütsü atema sorkari four?lane lenmang project aika tenzü. Tenemtem telung nung lungki tsüngpoksü atema gol tulu aser bomb tesashi aika amshir. Item kuli ajanga region nung tzü-mopung dak sendakba lendong kanga bulua ataloker," ta bench-i metetdaksü,

Himachal ya tenem lima ka lir, saka meimchirtemi merumeroa inyaksangshiba ajanga menoknok, tzümetsüng anentsüh lendong kanga bulua ataloker, ta bench-i metetdaksü.

"Onoki reprangtetbatem nungji ajemdaker Himachal Pradesh state-i tekarakba nung telemtetbatem agia inyaksüla. Centre sorkaria state nung lendong ataloktsüsa inyaksangshibatemi nokdangtsü atema inyaksüla," ta bench-i metetdaksü.



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 05, 2025

Arem shiruru o nisung na

Nagaland nung Wokha district kübok mapang mapang shia arem shiti-i nisung tepsetba den alu aser kiojen raksatsüba agi yimtaklirtem tetsübu nung aliba tensa tia ya parnok timtem lendong ajururtem asoshi dang masü saka asenok ajak asoshi shisabolutsü mapa ka lir, kechiyong tanü Wokha district nung atalokba kasa lendongji asüng asenok alidak ataloktsü ana nung dang lir, anungji ibai nübortem o government na pronglai kanga süoki ia bilema inyaksüba mapa ka lir. Nisung o arem shiruru na tebendangji nisungtemi yim kümteta kiojen yanglur alir aser arem shirururtem asoshi jenokdak aser chiyongdak tesemji arem lir, anungji nisung o arem shiruru na artsüji yimtsüng o arem naji lir. Aji oda, nisung aliba lima o arem shiruru aliba lima naji katia- katia alima balala ta bilema, kati ka tim metemdaktsütsüsa akhümtsübutepa alitsübaaji kanga tenüngdaktsü akümer. Atangji, nisungtemi arem shiruru shiti aser keyi ama yimtsüng anasa adoka amongba ajanga takoksa lendong timtem ajuruba indang jembir, ajisüaka asenoki mangashir aser mangateter dang ashi, nisungtemi arem leptoktsüba aser arem nung shirururtem jajaba lenmang aser amongdak tesem raksatsüba agi arem shirururtem timtem aser takoksa ajuruba indanga parnok rongnunga kanga jashitepa jembia alitsüa akok. Mapang ka Shamator len nisung tanela aliba keyi kati nisung ka nguset achi aser ibaji puteta iba keyi tanela aliba nisungji par yimtak yimteni okadak jaoka temerenshi agütsütsü asoshi ken o lapoka, nisungba dangji kechiba nai nisung nguset ta asüngdang dang, “nenok nisungtemi onok arem shirururtem achitsüba chiyongtsü shitsü aser mesü ama shiruru ajak khaseta chitsür arem tazüng toktsür, anungji onok ayaba agi nisung dena nguset achi tsüsa akümer,” ta langzü, anungji yimten jagia kechiang mashi ken o ji angateter temerenshi magütsüi ken o ji yangji atemba tatalokba ka lir. Iba kasaji, asenok lima ajaklen ataloker. Alima nung taküm aliba shiruru aser ozü sangnu ajak ya ka aliba agi ka alir, kechiyong parnokji karbo kar asoshi chiyongtsü asütsüsa Tsüngremi poktetdakja lir, kasaji süngdonglidong aser ai narotema lir. Aji oda, arem aser shirururtemia nisungtem asoshi yanglutsüba lir saka tagishi maka mashimashi lepdoktsüba aser samatsütsüba masü saka asenoki ketdang asü shia, asen nüngdak asoshi agir tanüngbaji jungjunga anepalua wazüka ayutsü asoshi Teyangluria mezüng nungi asenok nem khuret nunglokja lir. Iba khuretji meteta, nisungtemi arem shirururtema parnok alidak arem nung parnok nüngdak peria ngua alitsüsa asenoki arem wazüka yutsütsü aser parnok jajadak lenmang nokdanga meyutsütsü aser ayong nung aliba takümtema timmetemi alitsüsa asenoki timtem magütsüi ayong kümzüka aser merükteta yutsütsübaaji angateta inyakra, arem shirururtemia asenok nem timtem magütsütsü. Arem shirururtemi asenok alidak tashi aruagi timtem agütsüba ya asenoki parnok nem timtem agütsüba agi tejashi marem mangyangtsü aruba amai lir. Asenok nisungtemi metettsüba kaji, arem shirururtem yagi asenoki parnok nem timtem magütsüra parnokia asenok nem timtem magütsür. Ibayongji, arem shiruru, talisa, keyi taküm yimya indang zülur Edward James Corbett-ibo keyi ya temulung tulu aser ajemalu shiruru ka lir, kechiyong asenoki parnok meyrutsüra parnokia asenok meyrutsür ta züluba ajanga nisungtem nem tangatetba agütsüba otsü kaketrejutem nung azünger. Itemji kodang asenoki angatetdir, Tsüngremi alima nung kechisarina yanglua toktsüba nükjidong aser ketdangsüyim indang asenoki tajungba angatettsü. Arem shirururtem ya asenoki asenok tsükchir masü ta angatettsüla aser parnok den tsükchir mayimtsüla. Aji oda, alima nung ya asenok mali nung parnokbo jangratema alitsü saka parnok mali nungbo asenokbo melitettsüa akok. Parnokji asenok asoshi yanglutsüba takümtem lir, anungji asenoki parnokji apayua aser meima anepalutsü tim. Aji oda, tanü asenoki asen lima nung arem wazüka ayutsü indang jembiba ya tzü mopong merüktettsü asoshi kisüng masü saka arem shirururtem yimtaki madoki arem nung parnok nüngdak ajak peria tipdema litettsüsa anepalutsüba indang jembir. Asenoki angatetsüba kaji, arem shirururtem tipdema litettsüsa arem lira, asenoka yimtak aser alu nung tipdema alitsü.

OLEMSABANG

Tsüngremmung asü Tsüngremmong?

~ T. Meren Paul, Lower PR Hill, Kohima

Yashi yakünü August 1&2, 2025 nü asen Aor Tsüngremmung amungtsü jeli osang prokba aser aji oda yimti tesem palala nung, talisa Kohima nung Tsüngremmung kanga longsoa takok tulu ngua amungba osangkaketdem nung züngshiogo. Jeli sangdong aser sentong dem nung ajenloka aliba spelling tapu palala ana amshia angur. Sentong karh nung Tsüngremmung ta aser karh nungbo Tsüngremmong ta zülumen palala amshia angur. Benjungmungbo ka tang saka tenüng spellingbo ana ta amshiba jagi tangar kin dang masü asenoka sünga bangkadaktsüba angur aser WhatsApp group palala nung spelling koba shidak ta asüngdangtepba nguogo. Medemer karhibo kü dangia jangjashitsü asüngdangtepogo. WhatsApp group nung Arok Osep Yimotir Rev. C. Walu Walling-i Tsüngremmung ta amshiba jiang shidak asütsü ta jangjatsüogo.

Tsüngremmung spelling ya akhidang nungi amshia aruba kuli eshika ni bener arudi. Arok Osep nung Moatsü bo angur saka Tsüngremmung yabo zülua manguba agi asenok spellingji tapu ana amshir aser ratamatateper. Tsüngremmung ta ojang ka mejetteta küma zülua meliaka Arok Osep page 274 nung Tsüngrem ta zülua angur. Ano page 19 nung amung, amunger, amungnü ta angur. Page 145 nung mungdang ta angur. Dr. Clark dictionary page 865 (Revised Edition) nung Tsüngrem ta angur aser page 460 nung mung ta angur, anungji tsüngrem + mung ojang anaji metentep nung tsüngremmung ta adoker.

Asenok ajaki meteta aliba “The Ao Nagas” by J.P. Mills-i züluba kaket page 110, 215, 216, 223, 367 nung Tsüngrem ta zülua angur aser page 219 nungjibo Tsüngremmung ta mejetteta zülua angur. J.P. Mills “The Ao Naga” ya mezüng 1926 nung Macmillan and Co. Ltd, London rokoi menüng aser tanapuba 1973 nung Bombay nung menüng. Anungji 1926 dang tama nungi Tsüngremmung spellingji amshia aruba angateter. J.P. Mills dang tera agi tama American nunger sociologist W.C. Smith shiba Impur School nung arua Ao oshi nung kaket zülua adokba mapa inyak pai “The Ao Naga tribe of Assam” kaket züluba angur. Pa kaket page 77 nung “Tsüngrem” ta züluba angur aser page 85 nung “The Tsüngrem mung, or asum nu mung” ta zülua angur. Par mapangjibo Dr. Clark Dictionary 1911 adoker aliba ajanga spellingji Clark dictionary nungjagi agizüka amshi südi. Clark-i German umlaut ü zülü mamshi saka “tsü” melenä “tsy” ta amshiba angur. Asenoki ü ya tesülen dang amshiba angur.

Tasempuba kaket zülur Hindu nunger doctor ka tenüng agi Dr. Surendra Nath Majumdar Kohima Hospital nungi Mokochung Hospital-i transfer arua inyakba sülen pai “Ao Nagas” ta ser kaket tila ka 1925 nung zülü. Pa kaket page 33 nung Tsengrammong ta temesüng nisungdemi amshiba spelling den kenyonji palaka amshia angur. Par Hindu nunger tsüngrem tenüng “Ram” enoka tseng-ram-mong (tsengrammong) ta amshiba amah angateter. Asen Ao Temeshi Laishiba nung “amungba” indangji mezüng Lipok 2:2 tenetnübuba nung Tsüngremi pai yangluba mapa ajak nungi pai mungzük ta angur. Anitet 20: 8. Amungnü meshiteta mungang ta angur, ajioda Tsüngrem aser Mung spellingji tetenzük nungi amshia aruba angateter.

Mong, among tetetzü spelling “o” nungi “u” ya oren palaka aser tetetzü palaka nung amshir. Tat. Raratepdang, tanur merenshidang tekolak ku among ta süra tekabo agi ku nung amer azüleni atsüshiba dang ku among ta ajar. Ano second hand süoshi amongshia shimtetba amahla. Amung ta süra kidang amungba, benjung amungba yamahla.

Tesüiba küm noklang tema tejaklen temesüng nisungdem, Dr. Clark, J.P. Mills, W.C. Smith nungeri spelling shidak zülua aruba tanü asenoki koba shidak aser koba tai ta memeteti alibaji kanga taktsüka aser tejakleni masü tesüleniang aluba sayur. Asen Aori Moatsü aser Tsüngremmung spelling memetetbaji Christian demi Christmas spelling memetetba ama asütsü. Sangküm nungibo Tsüngremmung spelling ya shidak lirumedema amshitsü merangdi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan melungtet telok Tearfund-i Silas Balraj CEO shimogo



Silas Balraj

August 04, 2025: Khristan melungtet telok Tearfund-i Silas Balraj CEO shimogo aser taruba ita nungi pai iba mapa tasen agizüksü.

Balraj-i küm 20 dak tali Compassion International nung inyaka liasü. Tamalen pai Country Director for India, Vice President for Asia aser Compassion global Programme Team nung Senior Principal inyaka liasü.

Balraj-i, "Tang ama kanga

tongtimbang mapang ka nung Tearfund nung adenba atema ni kanga pelar. Alima tesem balala nung nisung million aika kanga sensak tia aser reshikangshi tensa nung lir. Temelenshi adokdaksütsü atema Tearfund-i local Arogotem den longjemer inyakba ajanga ni ajungmesor. Nüburtem timtem nungi anitettsü atema Arogotemi shilem tajung agiba atema ni pelar aser iba mission nung

shilem agitsü yongyar," ta ashi.

Tamalen Balraj-i private sectors nunga inyaka liasü. Pa Compassion International nung meinyakdang India nunger IT industry nunga inyaka liasü.

Tearfund Trustees nung Chair, Anna Laszlo-i, "Silas-i lenisüba tsütsü aika ajangshia lir aser pai mangdang tajung bener Tearfund nung adener. Nüburtem rongnung temelenshi adokdaksütsü atema Arogoi tongti shilem agiba pai reprangtetbaji onok asoshi tajemdakdak südaksür onoki kanga sensak tia tebilemtsütem atema inyaksü. Pa ya mangdang aliba lenir ka aser Silas-i shilem tajung agitsü onoki yongyaa atar," ta metetdaksü.

Tesüiba küm ka tsüngda Tearfund mapatem ajanga nisung million 2.9 dak tali ayimjemogo aser parnoki local Arogotem den sentepa inyakba sentong balala ajanga nisung million 6.1 ayimjemogo.

Balraj-i CEO mapa magizük tashi Tearfund Chief Operating Officer, Tim Pilkington-i CEO mapa bena atatsü.

Khristmas nung Khristan 200,000-i Khrista osangtajung lemsateptsü

August 04, 2025: Taküm Khristmas mapang nung Khristan 200,000 nem Khrista osang tajung lemsatepba nung shilem agidaktsütsü atema campaign ka tenzükogo.

'Shine Your Light 2025' omen nung ajemdaker tenzükba campaign ya National Day of Prayer and Worship (NDOPW) leniba nung agiogo aser iba campaign ya yimtenren lenirtem aser Khristan networks/denomination 60 dak temaia pusemer.

Iba outreach sentong ya mezüng 2023 küm tenzuka liasü aser iba mapang nungji Arogo 700 dak temai shilem agi, ajisüaka 2024 küm Khristmas outreach nungbo Arogo 1,500 dak temai shilem agia liasü.

NDOPW Convenor aser Shine Your Light tentetsang, Dr Jonathan Oloyede-i, "Tang mongpu ya meiwa mapang lir, ajisüaka Khristmas matongdang Shine Your Light atema ni UK Arogo nem nenshia metetdaksüner. Khristmas mapang Khrista tiyongtsü südaksütsü atema linük nung Arogotem ajaki longjemer iba campaign agir," ta metetdaksü.

"Yaküm UK nung aliba yimtitem, jilatem aser yimtsüngtem nung Khristan 100,000 dak temai lenmangtem nung Khristmas Carol sentongtem agia nisung million 1 den Khrista osangtajung lemsatep liasü. Takümbo iba sentong nung Khristan 200,000-i shilem agitsü mangdang yur onoki Tsüngrem

taochi dak dang imlar," ta Dr Jonathan-i metetdaksü.

Khristmas atongtsü atema ano mapang talangka lir amai asenoki bilemer, ajisüaka kanga kera atongtsü, ta shia Dr Jonathan Oloyede-i Khristantem dang iba outreach nung shilem agitsü atema renemshia lidaktsüner, ta ayongzük.

"Ni UK Arogotem dang schools, colleges, universities, shopping malls, tepuokdak, mapa inyakba tesemtem aser yimti lenmangtem nung Khrista osangtajung lemsateptsü atema renema lidaktsüner; Ireland, Northern Ireland, Scotland, England aser Wales tesem ajaklen osangtajung lemsateptsü atema renema lidaktsüner," ta pai metetdaksü.

Shine Your Light 2025-i taküm May ita nung official süa parliamentary reception sentong agiogo. Iba sentongji All-Party Parliamentary Group for International Freedom of Religion and Belief Chair, MP Jim Shannon leniba nung agia liasü. Iba sentong nungji linük tesem balala nungi Khristan lenir 100 dak tali aden.

UK nung denominations aser networks 60 nungi Khristan lenirtemi tanela nung longjemer tesüiba mapangtem inyakba asadangba den külemi tarutsü nung teinyaktsü wadang atema asalentong yanglua inyaker. Item rongnung taküm Pentecost hopta nung June 6 nungi June 8 tashi ghonda 72 UK tesem ajaklen lumia

sarasademba aser December 12 nungi December 14 tashi Khristmas dak sendakba sentongtem ayongzuka agitsü aliba densema lir.

ANOGO ABEN TSÜNGREM DEN

Tsüngrem meteni takok

Mosai langzü, "Ne tadenba onok den marura, onok yang nungi anir tuoma". Anitet 33:15

Taküm nung takok balala anguba nung Tsüngrem medenra Pa sentsüwangshi mali. Takok angutsübaji dang ne nükjidong yur Tsüngrem den tesendaktep melira tesasatsü. Tsüngremi Israel nunger nem takok agütsütsü nangzük, alima aser rongsen ajak parnok meyong akümtsü, shingaia parnok menokdangtettsü aser anema aruyonga makoktsü aser kechisarena ajak ajangzük tetaka Tsüngrem tadenba melira amajok. Kechiyong parnok mulungjang Tsüngrem nungi talangka pilar liasü.

Israel nunger otsü nungi asenoki ya angatetdi; takok ngua inyaktetba jagi Tsüngrem dena lir ta mesayur. Na anema aliba, shishilembaba nung takar akümba, kechisarena nung takok anguba nungji Tsüngrem dena lir mali? Ajak ajangzükaka Tsüngrem tadenba melira taküm nung tongtipangtiba agi mabensa ta metetdi.

Mosai takok anguba jagi Tsüngrem den tesendaktep melentsü makok ta sayur. Alima tajangzükjibo mela mela sama aotsü saka Tsüngrem den tesendaktep jibo teti alitsü. Takok, rongsen, konang tetushi aser tashi jagi Tsüngrem den tesendaktep ayuba melentsü makok.

O Tsüngrem, mapang ajak nung Ne den sendaktepa lidi. Amen.

China nung sayutsüngiba recordings alemba atema pastor ka apu



Pastor Huang Yizi

August 04, 2025: China nung Protestant pastor kati sayutsüngiba recordings alemba atema Communist sorkar ketdangsertemi puogo.

Zhejiang Province kübok Wenzhou nung Arogo lenir pastor Huang Yizi-i ozüing alema business inyakogo, ta pa nem tai tonglokja apu.

June 26 nü mezüng Zhejiang Province kübok Ningbo, Quzhou aser Taizhou yimtitem nung pastor Huang den Arogo nung züngsem pezü Pingyang Public Security Bureau-i apuba sülen tasüngnü ketdangsertem ket nung ayu. July 25 nü Khristan anabo

chiokogo. July 17 nüa Khristan ka apu aser tang tashi tepuokdak lir.

Pastor Huang apuba osangji July 30 nü ang sangdonga liasü. Huang atema jembitsür kati, ketdangsertemi jelia osang memetetdaksüi apuba ajanga inyakyim teladak masüba jangjar, ta ashi.

2014 küm nunga sorkar ketdangsertemi Pastor Huang apuba sülen küm ka dak tali tepuokdak yua liasü. Wenzhou nung Tenla kitem nungi Kangjiki indoktsüba anema longkak aitba nung shilem agiba sülen pa apu.

Pa chiokba sülen ita ka shi

dang lirbo ano pa apu. Linük security lendongi yoktsüsa pai inyakogo ta pa nem tai tonglokja apu.

Pastor Huang'er Arogo ya mezüngbo sorkari melaba Three-Self Patriotic Movement (TSPPM) nung densema liasü saka tangbo underground Arogo lir.

Khristantem yimsü temeden nokdangtsü atema sorkar ketdangsertemi 'ozüing alema business inyak' ta aiben tai tonglokja arur.

Ibaji aija Chinese Human Rights Lawyers Group-ibo, tamangba yimsü temeden kübok sayutsüngiba onüktem record süa lemsateptsü temeden lir, ta ashi.

Khristan melungtet telok Christian Solidarity Worldwide (CSW) Tir, Mervyn Thomas-i, "Pastor Huang Yizi apubaji CSW-i aitsür. Onoki pa tangsa chiokang ta akhanger aser China sorkar ketdangsertem dang yimsü dak sendakba ken o ajak ozüing kübok shidak angadangtsü akhanger. Iba dak alia item ken o nung tai tonglokja alirtem nem parnoki melungba lawyer tem agütsütsü aser ken otem shidak angadangtsü onoki akhanger," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tesasatsü****(adj)** takoksa anguba, tejashitsüka (regretful)

* Tesasatsüka, ni ozü tsürabur meyariteti yok.

Tesashi**(adj)** tanep masü, ain apong tamajung (fierce, harsh, cruel)

* Nisung tesashi den aikati meliteter.



Tir Yimyim

OLONG PAITEP # 7230

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPIEN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S ____
13. Yagi ajak ashiochtsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7229 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER MA**ALIMA NUNG NISUNG TIMTIBAI JEMBIBA OSHI TER:**

English	(1,456,448,320)
Mandarin Chinese	(1,138,222,350)
Hindi	(609,454,770)
Spanish	(559,078,890)
French	(309,804,220)
Modern Standard Arabic	(273,989,700)
Bengali	(272,828,760)
Russian	(254,997,130)
Portuguese	(263,638,850)
Urdu	(231,717,940)

Tanur asoba anogo nung salem osang den noksa angati adokdaksünöra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Rahul-i Pakistan-Bangladesh muslim nunger den nokdaker: Assam CM

Bodoland Territorial Region (BTR) semdangba mapang tangokba noksa angur.

Guwahati, Luroi/August 4 (Agencies): Assam Chief Minister Himanta Biswa Sarma-i Deobarnü, Rahul Gandhi ya Pakistan aser Bangladesh Muslim nunger lenir lir ta ashiba sülen yimden yimsüsüba nung mepetmsü adokogo.

"Rahul Gandhi ya Pakistan aser Bangladesh nungi Muslim nungertem lenir lir," ta Sarma-i pa indang official X handle nung zülutsüba sülen yimden yisüsüba nung parnok anemertem aser commentator temi pa aitsüogo.

Bodoland Territorial Region (BTR) nung osangbenertem den sensaksemba mapang Sarma-i, "Rahul Gandhi ya India

anemer ka. Pai Pakistan aser Bangladesh nungi Muslim nungertem den dang nokdaker. Pa India nung Hindu nunger Muslim nunger den dena mali. Rahul Gandhi ya linük ashiochtsür ka lir," ta pai ashi.

Sarma-i anogo anabuba atonga BTR semdangba mapang iba olen lemsatopogo. Osangbenertem den sensaksemba mapang pai Congress lenir ya indang indanga aija liasü.

September ita Bodoland Territorial Council (BTC) election magi tsüngda Tamulpur district kübok Kumarikata nung lokti senden ka nung o jembiba mapang Sarma-i, BJP-i terenlok atema jenjang balala agiba aser

agitsü sentong alibatem indang benoka jembi.

Sarma-isa, Election Commission-i August 20 sülen BTC election atema osang agütsütsü aser Durga Puja matong tsüngda election tembangtsü imlar, ta ashi.

Tang ozüing alema ali atsünger aliba azüingteta aoba dak sendakba nung Sarma-i, Tamulpur kübok Angarkata aser BTR kübok tanga tesem balala nung aliba lisopurtem dang shisa mebulutsü metetdaksüogo.

"Nenok dak langka danga atalokra ni arutsü. Ni chief minister asü tashibo India nunger mesüra Assamese nunger shinga miyirutsütsü," ta pai tenangzükba agütsü.

PM-KISAN kübok Mizoram nung aluyimer lakh 1.3 ajangzükogo

Aizawl, Luroi/August 4 (Agencies): Pradhan Mantri Kisan Samman Nidhi (PM-KISAN) Yojana indang installment 20buba kübok Mizoram nung aluyimer lakh 1.30 dak temai senotsü teyari sen crore 398 dak tema agizükogo. Installment ya Ato Kilonser Narendra Modi-i Honibarnü agütsüogo, ta ketdangsürtemi ashi.

Sentong nung PM-i, Direct Benefit Transfer ajanga linük ajunga nung aluyimer crore 9.7 shi atema sen crore 20,500 agüja liasü, ta parnokisa shisem.

Iba sentong ya tagidak nung District Agriculture Offices aser Krishi Vigyan Kendras (KVKs) ajanga Mizoram kübok district balala nung sayua liasü.

Selesih kübok KVK Aizawl nung state-level sentong agiba mapang Environment, Forest, and Climate Change Minister Lalthansanga alakteta jaoker liasü.

Iba sentong nung Special Secretary Ramdinliani, Agriculture Director R. Lalnunzira aser Agriculture & Farmers' Welfare Department nungi tanga ketdangsürtem den KVK ketdangsürtem, PM-KISAN beneficiary tem aser Farmer Producer Organisation (FPO) züngsemtemi shilem agia liasü.

Sentong nung o jembiba mapang Lalthansanga-i, PM-KISAN scheme ajanga Mizoram nung aliba aluyimertem maneni nongita yariba atema Centre sorkar

dang kanga pelaba lemsatop. Paiza, beneficiary tem dang scheme nükjidong atalokdaksütsü atema senotsü ya tajangzük ka-a amshitsü ajungshia liasü.

Paiza, state sorkar indang flagship sentong Handholding Scheme indang tanabuba shilem aluyimertem atema online ajanga apply asütsü lapoktsüogo, ta ashi.

PM-KISAN Scheme ya 2019 küm amenok aser Mizoram nung Agriculture and Farmers' Welfare Department-i benoka arudar.

Iba scheme kübok temsüa aliba aluyimertem nem küm nung sen 6000 installment asem kuma lemsar agütsüdar, ta ketdangsürtemi metetdaksü.

Assam sorkari Aug 8 nü ali behga 300 azüingtettsütsü

Guwahati, Luroi/August 4 (Agencies): Assam kübok Negheribill nung August 8 nü ozüing alema sorkar ali atsünger aliba azüingtettsü atema Golaghat district administration aser Forest Department na renemdar. Iba tesem ya Merapani den arrtsü nung lir.

Ketdangsürtemi arem ali atsünger aliba bigha 300 shi azüingtettsütsü sentong lir, kong kibong 205 shi lidar.

Ali azüingtettsü atema anogo sangdongba sülen iba tesem nung tensa mejungi kümogo. August 2 nü Sarupathar nung osangbenertem den sensaksemba mapang Assam

Chief Secretary M.K. Yadav-i state tamendakdak nenshia metetdaksüba sülen nüburtem mesüingjemteti kümduksü.

Iba sülen Negheribill nung alir shilem 80-i pei talidak ki bena osettsüt bener iba tesem toktsürogo. Kibong aikati pei ki oset jenjang dalang agi yoktoker apusoago.

Kasa mapang nung kibong 40 shi-i Gauhati High Court dang anogo atsülangtsütsü atema temepeshiba ka agütsüogo. Okadaki parnok nem khen atema anisüingzük agütsüogo, saka district ketdangsürtemi ashiba agi, tanungba tesemtem nung

sentong yanglur aliba ama maparen benoka inyaksü.

Local sources balala ajanga ashiba agi, Negheribill ya nisung maliba yimtsüng ama kümogo aser kibong ishika dang anunga lir, shirnok yimtsüng toktsür aotsü atema renemdar.

Ketdangsürtemi ashiba agi, temzüing ozüing sülen shitak anidaka iba inyakyim benoka inyakdar. Ita ishika tsüngda ozüing alema ali atsünger alirtem nem pei aliba tesem toktsür aotsü atema osang agüja arudar. Kasa mapang nung inyakyim kecha tetsükdaksü makai benoktsü asoshi security personnel tema renemdar.

US envoy Witkoff taruba hopta Russia-i aotsü: Trump

Washington, Luroi/August 04 (Agencies): Ukraine nung raraba indang maneni jembitsü asoshi special envoy Steve Witkoff taruba hopta Russia-i aotsü, ta United States Tir Donald Trump-i ashi.

Deobarnü osangbener tem den jembidang, "Witkoff-i taruba Bodhbar mesüra Brehostibarnü semdangtsü akok," ta Trump-i ashi.

Sanctions tali agütsütsü aliba jenbutsü asoshi Russia-i kechi inyaktsüla ta osangbeneri asüngdangba langzüdang, "Nisung tepsetba anentsüsa tezüngzüktep ka yangluang," ta US tiri langzü.

Ukraine den yakta ceasefire deal ka meyanglura Russia dang tariffs kanga tesashi meshitsü ta Trump-i amokmerena lir.

Taoba Russia tir Dmitry Medvedev den online ajanga mangatettep adokba sülen pai nuclear submarines ana yokba ya tang region nung lir ta Trump-isa ashi.

Ajisüaka Trump-i nuclear-powered asü nuclear-armed submarines ar mashi. Pai submarine aliba tesem tejangja rasa mashi, koba US mitkari miimshir.

Brehostibarnü Russia-i Ukraine yimtiba, Kyiv nung apartment block ka amakba nung nisung 31 tepsetba ya

tesempatsü mapa ta shir sülen tang tesüsa pai iba o ya ashi.

Ibai ita ka nung Russia-i otsü yanglua long-range drones 6,297 amshia Ukraine dak amakba alitsü, koba July 2024 nung amakba dang 14 ben agi tali liasü.

Ukraine ya US-i yangluba Patriot surface-to-air missile system angutsü teimla nung lir, koba Trump-i agütsütsü nangzüka lir, saka iba nok-nü indang sen ya Trump administration masü saka Europe nungi Ukraine tembar linüktemi menoktsü.

Ukraine-ia tanen makai Russia nung amaker, aser tesüsa Deobarnü amakba nung nisung asem tepset aser oil refinery nung mi tulu adoka liasü.

Hombarnep Ukraine-i drone ka amshia Volgograd region nung amakdang railway station ka nung mi adoka liasü, ta regional administration-i Telegram nung ashi.

Tanen makai raraba mapang Russia aser Ukraine ketdangsürtem Istanbul, Turkey nung senden ishika menogo.

Tesüsa senden amenba nung tepuokdak alir nisung 1,200 melenteptsü tezüngzüktep yanglu, ta Ukrain Tir Volodymyr Zelenskyy-i Deobarnü sangdong.

Russia nungi telangzüba agüja mali.

Witkoff ya real estate magnate aser Trump den külemi golf asayar ka lir, shibai White House special envoy ka ama Moscow nung Russia Tir Vladimir Putin den ishiben ajurutepogo.

Middle East asoshia special envoy ka asünung, Israel aser Hamas tsüngta jembishinüba nunga Trump melen oa sholem agir, aser iba yongji pai Honibarnü Tel Aviv semdanga Gaza nung pua aliba kinungertem ajurua liasü.

Kasam mapang Russia Tir Vladimir Putin-i Ukraine rara nung ceasefire alitsü asoshi jembishinütsü atema Ukraine Tir Volodymyr Zelenskyy den majuruteptsü shia mali, saka iba ama ajuruteptsü asoshi tapet terenemshiba alitsüla, ta Kremlin-i Hombarnü ashi.

"Putin-i Zelenskyy den majuruteptsü bilema mali. Ajisüaka iba atema kanga kumdanga renemtsüla aser ibaji ano meinyak," ta Kremlin odongtar Dmitry Peskov-i ashi.

Witkoff-i semdangtsü aliba ya tongtipang aser teyari lir, ta Peskov-i ashi. "Moscow nung Witkoff den ajurutsü onok teti pelar... Iba ama ajurutepba ya tongtipang, nüngdaka aliba aser teyari lir ta onoki züngshir," ta paisa ashi.

Pakistan-i maneni Afghan refugees tem mindoker

Peshawar, Luroi/August 04 (Agencies): Federal government-i Afghan refugees tem alitsü anogo atsülangtsü memulungba sülen Pakistan nung ketdangsür temi Afghan refugees tem tashiyim amshia par linüki meyipa yoker, ta ketdangsürtemi Hombarnü ashi.

Iba telemtetba yagi Afghan nunger Proof of Registration cards bena aliba nisung 1.4 million shi dak kongshitsü, shirnok indang legal status June ita tatemi liwaogo. Afghanistan-i meyipa maodang ki o jen ayoktsü mesüra business tembangtsü asoshi küm kabo atsülangtsü südi ta aikati imlaa liasü.

PoR card holders den ano Afghan nunger nisung 800,000 shi Afghan Citizen Cards bena lir. Police temi parnok ya linük nung ozüng alema aita alir ta ashir aser Punjab anüdoklen, southwestern Balochistan aser southern Sindh province nungi parnok pei linüki meyipa yoktsü lia apu.

Hombarnü iba telemtetba agiba atema United Nations High Commissioner for Refugees-i aitsür.

Taküm Iran aser Pakistan nungi Afghan nunger 1.2 million shi par linüki meyipa yok, ta June UNHCR report ajanga ashir. Iba ama nisung aika meyipa yokba ajanga Afghanistan tensa mejungi aliba tali tamajungba kumdaaktsütsü, kong 2021 nungi Taliban sorkari yimsü asür.

PoR cards mapang süiya

bener aliba Afghan nunger ajunga par linüki meyipa yoktsü Pakistan-i telemtetba agiba ya July 31 nü sorkari sangdong ka nung agüja liasü. Iba sangdong nungya Afghan nunger passports aser Pakistani visas tejangja malirtem ya linük nung ozüng alema alir aser Pakistani immigration laws kübok pei tasoli-i meyipa yoktsüla, ta shia lir.

Pakistan tesem ajungalen police temi Afghan nungertem apur aser border crossings leni anir aor, ta sorkar ketdangsür aser security ketdangsür anati ashi.

Yangji 'mass arrests' mali ta ashir aser police dang ki sema aotsü aser tapi agi mita oa bendangertem ozüng alema linük nung alirtem aputsü ashi.

"Hao, Pakistan nung ozüng alema aliba Afghan refugees tem yimya tajung agi meyipa yoker," ta northwestern Khyber Pakhtunkhwa province nung commissioner for Afghan refugees, Shakeel Khan-i ashi.

Rara, yimtenren tsütsü mepetmesü aser rongsenketzüng agi timtemba mechi küm 40 shi tsüngta nisung million aika Pakistan nung arua jenok. Pakistan nung ozüng alema arua aliba bendanger dak tenük yoker 2023 küm linük tesem ajungalen mera agiba sülen asendenshir deportation drive ya agir.

Sorkari tang tesüsa iba ama inyaksangshiba asoshi UN refugee agency indang odongtar Qaiser Khan Afridi-i

tebilemstsü khuret lemsatapa liasü.

"Iba ama yimya nung nisungtem meyipa yokba ya linük ka indang international obligations nung aibelen lir. Afghan nungertem pei sasa mulunga, meilongi aser yimya tajung nung meyipa yoktsüsa Pakistan-i inyaktsüla aser küm 40 dak tema linük nung Afghan refugee millions aika lidaktsüba atema pelar," ta Afridi-i sangdong ka nung ashi.

Yemen tzükum anasa rong ka makepok, nisung 68 asü

Sanaa, Luroi/August 04 (Agencies): Yemen tzükum anasa rong ka makepokba sülen Africa nunger refugees aser migrants 68 süogo aser ano nisung 74 samar bushir, ta United Nations migration agency ajanga ashi.

Yemen nung UN indang International Organization for Migration (IOM) tekolakba Abdusattor Esoev-i Deobarnü osangbener dang ashiba agi, iba rong nungya Ethiopia nunger nisung 154 mener Yemen indang Abyan province anasa makepok.

Iba rong raksaba nungi nisung 15 takum jenbu aser refugee aser migrants 54 tasümayang ya Khanfar district nung tzükum leni tzü agi bonger adok aser ano nisung 14 tesem balala nung tasü nguteta mozüki ka nung beter oa lir, ta pai ashi.

Aji masüdag Yemen health ketdangsür temibo nisung 54 süogo ta shia liasü.

Zanzibar nung aliba health office nung director Abdul Qader

Pelaba Lemsateper



Lt. Imchaangshi Longchar.
06/07/1985 - 27/07/2025

"Aser aji tamasa aliba ama auyiji ali-i meyiper, aser tanelajibo tagütsüsang Tsüngrem dangi sa shilangtsü". Sayutsungir 12:7.

Asur. Imchaangshi Longchar shiranga aliba mapang nungi tasüba tashi shirnoki sa nübu, rongsen, sarasadem, tenla, aser shisatsü ajanga ozü den yaritepogo nenok ajak dang kanga pelaba lemsateper.

Kecha, kibong, medemer, kidanger, kiyonger, lokti balala, arogo aser pa inyaka aliba unit ajak dang nenoki meima yariba ozüi kecha meyipa magütsütetter, saka tulusang Tsüngremi nenok ajak moajangma ta aji ozü tamang aser sarasadem.

Temeim Kinungtsü, Jala & Kinunger.

OFFICE OF THE AOYIM VILLAGE COUNCIL

AOYIM Village
CHUMOUKEDIMA - 797103, Nagaland
Govt. Regd. No.GAB-13/17/83 (Vo I-IV) 8th Jan.92
Ref.no AVC/GEN-1/2025-3Date5/8/2025

TENÜNGSANG AGÜTSÜR



SUNGRATSÜ yimtsüng nungi Asür J. YAPANG IMCHEN'er jabaso SENTIYANGER IMCHEN, IAS sorkar mapa nung temaba jenjangi tua August 1, 2025 nü Government of Nagaland indang Chief Secretary menden tongtetba asoshi Aoyim Village Council ajanga tenüngsang agütsür.

Pai bendanga agütsür ochi nung Nagaland nung aliba nübur tenzükbba asoshi onoki pelaba lemsateper.

Pa wadang nung tia tajung lidakjang ta sarasademtsür aser maneni takokba alitsü imlaa atar.

Sd/-
(IMLINUKEN AO)
Chairman
Aoyim Village Council

Sd/-
(TEMSU PONGEN)
Secretary
Aoyim Village Council

Bajamil-i ashiba agi, Shaqra timti anasa asürtem aremstsü ketdangsürtemi anepalutar aser tensa mejungi liaka samar alirtem maneni bushitar.

Yemen aser Horn of Africa tsüngta tzü lenmang ya anatsülen nungi senzüba refugees aser migrants temi amshir saka lendong timtema jenti lir. 2014 küm Yemen nung civil war tenzükbba sülen iba lenmang ajanga par nüburtem linük yutsür jena aoba tali kumogo.

Houthi telungpur aser sorkar sepaitem tsüngta April 2022 nung rara anena atatsü tezüngzüktep ka yanglua azüdokshi ajema akum aser Yemen nung humanitarian crisis tera süngjema kumer lir.

Kasa mapang Africa nung rara, talisa Somalia aser Ethiopia nung rara nungi jena aor karbo Yemen nung jenoker mesüra iba linük ajaka Gulf linüktep bushia aor. Ibai alima nung migration lenmangtem rongnung

mazüngtiba aser tamajungtiba lir, ta IOM ajanga ashir.

Yemen atongtsü asoshi shibelener temi nisungtem ya lendong aketba aser nisung tali amenba rong tem nung anir Red Sea mesüra Gulf of Aden ajanga senzür.

IOM ajanga ashiba agi, 2024 küm refugee aser migrants 60,000 dak tema Yemen tonga aruogo, anungji 2023 küm nisung 97,200 aruba nungi kanga agi tajemba lir.

Tzüyim nung patrols senzüba tali akumba ajanga migrants aser refugee tem senzüba ajema akumer, ta IOM ajanga May ita sangdong ka nung ashi.

Iba lenmang nung taoba küm nisung 558 süogo ta parnoki ashi. Tesüiba küm ter tsüngta iba lenmang nung nisung 2,082 shi samaogo, aser item rongnung tzü nung arakseta azüba tejangja 693, ta IOM ajanga ashir. Tang Yemen nung refugee aser migrants 380,000 shi lir.

NOA tiri ayongzüka lepa reprangshiba senden amen



Dimapur, Luroi/August 4 (TYO): Nagaland Olympic Association (NOA) tir aser Nagaland Chief Minister Dr. Neiphiu Rio lenisüba nung August 4 nü NOA Office, Kohima nung tang saisabong dak sendakba nung inyakyim balala aser taruba asayamungtem atema lepa reprangshiba senden ka ayongzüka menogo.

Senden nung Meghalaya nung 2027 küm 39buba National Games ayongzüka asayatsü aliba indang sensak asem. Iba asayamung nung Wrestling

asaya co-host asütsü atema Nagaland-i formally benokogo.

Tir-isa, taruba North East Games atema sentongtem lepa reprangshi, koba 2025 küm October ita asayatsü liasü saka 2026 küm tetenzüklen asayatsü belenogo. Iba asayamung ya Tripura-i ayongzüka asayatsü.

Kasa mapang nung 2025 küm November ita 14 nungi 23 tashi UWW Alysh Belt Wrestling & Naga Wrestling World Championship aser 1buba Dr. T. Ao Junior (Girls) National Football Championship asayatsü aliba indang tatongi

sensaksema liasü.

Tir-isa, terenemer aliba NOA gym facility semdanga asadangogo. Gym Instructor, Multi-Task Assistant aser merekmejur mapa atema advertisement adoktsüogo. Iba facility ya yakta inyaksangshi tenzüksü imlar.

Dr. Rio-isa, Nagaland nung saisabong ajungkettsü aser state ya national aser international saisabong nung tongtibang shilem agir ka kümdaktsütsü atema pa bendanga agütsür aliba nenshia metetdaktsü.

India-i England den Test asaya 5buba kokogo

Luroi/August 4, 2025 (Agencies): India aser England na tsünga Oval nung Test 5buba kanga toktepba asayar tatembangbuba anogo India-i run 6 agi asaya koka asayamung ya asaya anana akokba den ka draw süir tembangogo.

Anogo pezübuba nung Joe Root aser Harry Brook nati century yangluba sülen England team-i asaya akoktsü imla liasü, saka tatembangbuba anogo India nung bowler temi ball kanga junga ona asayaogo.

Tatembangbuba anogo asaya akoktsü atema England team-i run 35 nüngdaka asaya tenzük, aser Prasad Krishna-i ball aonba mapang mezüngbuba ball ana nung boundary ana azük. Ajisüaka Mohammed Siraj-i ball kanga junga ona tia melenshitsu. Pai mezüng Jamie Smith out sütsü aser ball ka dang lir ano Gus Atkinson out sütsütsü atema maongka angu saka KL Rahul-i ball majepzüktet. Iba sülen Siraj-isa taruba over nung Jamie Overton LBW agi out süja liasü.

Asaya nungsa Prasad-i Josh Tongue tera agi dang out mesütsü saka LBW atema review agiba sülen pa jenboa liasü. Ajisüaka over anashi dang lir pai Tongue ya bowled out süja liasü. Asaya akoktsü atema run 11 nüngdaka aliba mapang England team asoshi wicket ka dang anunger liasü.

Tatembangbuba asayar ya Chris Woakes liasü. Pa teka tachichilen mezüngbuba anogo yiruba sülen alepbanger aita batting ya tabelen agi mena liasü. Atkinson-i takok tashi Woakes batting memendaktsütsü meranga asaya aser pai Siraj indang ball nung six ka azük, saka talangkabo masayateti Siraj-i pa out süja liasü.

Iba asaya nung Siraj-i, tatembangbuba anogo wicket asem agiba densema wicket pongu agi aser pa nem player of the match naroküm agüja liasü.

Kasa mapang nung India Captain Gill-i asayamung nung century pezü yangluba sülen pa nem player of the tournament naroküm agütsüogo.

Dr T Ao Trophy: Niuland, Dimapur, Phek & Tuensang nungeri takok angu



Kohima, Luroi/August 4 (TYO): Dr. T. Ao Trophy 2025 inter-district football tournament nung Hombarnü Niuland, Dimapur, Phek aser Tuensang nungeri pei tata asaya kokogo. Iba asayamung ya tang Indira Gandhi Stadium, Kohima nung asayadar.

Hombarnü mezüngbuba asaya nung Niuland FC-i goal 9-0 agi Shamator koka liasü. Asaya nung Niuland nungi asayar Apeto-i asayamung nung otsü tasen ka yanglua asaya tenzüker second 17 nung dang goal ka idakja liasü. Paisa, minute 11, 20 aser 58 nung goal asem idakja ajak senteper goal pezü idaktsü.

Maneni Niuland team nungi Kakhevi-ia minute 10, 17 aser 34buba nung goal asem idakja hat-trick ka agütsü aser Tori aser Honoto natia minute 27 aser 39buba nung goal kaka idakja liasü.

Tanabuba asaya nung Dimapur-i goal 1-0 agi Noklak kokogo. Asaya nung Dimapur

atema goal ka ya minute 31buba nung Mangkholen-i idakja liasü.

Tasembuba asaya nung Phek team-i asaya mekoki aliba nungi meyipa tur Kiphire team goal 2-1 agi kokogo. Asaya nung Kiphire nungi asayar Longtibi-i minute 22buba nung mezüngbuba goal idaktsü, saka Kunuzo-i minute 26buba nung Phek atema goal ka idakja goal kasasa aküm aser iba sülen Eneibe-i minute 57buba nung tanabuba goal idakja parnoki asaya akok.

Hombarnü tatembangbuba asaya nung defending champions Tuensang-i maneni kanga junga asaya-a goal 3-0 agi Zunheboto kokogo. Asaya nung Ayenmongba-i ajak dang tajungba asaya aser pai minute 36, 46 aser 69buba nung goal asem idakja hat-trick ka agütsü.

August 5 nü asayatem:

1. Meluri vs Kohima @9am
2. Chümoukedima vs Noklak @11am
3. Kiphire vs Mokokchung @1pm
4. Mon vs Niuland @3pm.

Toronto Masters: Taylor Fritz quarterfinals-i iogo



Luroi/August 4, 2025 (Agencies): ATP Toronto Masters tebur kija asaya nung Hombarnü anepdang Taylor Fritz-i 7-6 (7/4), 6-7 (5/7), 7-6 (7/5) agi Jiri Lehecka madak takok ngua quarter-finals-i iogo. Tena tsüngda asaya ghonda asem asaya liasü.

Asayar ana tsüngda Deobar aonung menoa asayaba mapang serve ka danga break mesüi asaya 39 tashi asaya liasü. Tatembangbuba set tiebreaker nung Fritz-i aces ana oa Lehecka tera agi kokogo.

"Masters quarters ajaki

aitsü jangrademtsüka. Iba ajanga tanen makai junga asayaba sayur. Tanü ni tesem kar nungbo junga masayatet. Ni first serves junga otetogo, saka aibelen aika mena liasü," ta Fritz-i ashi.

Kasa asayamung nung America nungersa Ben Shelton-ia 6-4, 4-6, 7-6 (7/1) agi Flavio Cobillo kokogo. Asaya nung tena o langtepa liasü saka Shelton-i ashiba agi kecha süoki ia agütsü mali.

"Tiebreaker asayaba mapang pa jenjang mejungi agi, saka kü dang rangloker agiba masü ta shiogo anungji

kecha masü," ta paisa shisem.

Iba asaya akokba sülen Shelton ya quarter nung Alex de Minaur den asayatsü. Pai ATP-level nung asaya 100buba kokogo. Wimbledon aser Washington na nung quarter tonga asayaba sülen pa tang agi asayamung asem buba atonga quarter-i iogo.

Tebur kija asaya tanga ka nung De Minaur-i ATP nung asaya tenetbuba atonga koka Frances Tiafoe 6-2, 4-6, 6-4 agi kokogo. Australia nung asayar yagi Deobarnü Washington Open akokba sülen tang Toronto nunga takok tajung nguyonga odor.

De Minaur-i iba asaya akokba densema Tiafoe ya asemenbuba kokogo. Asaya nung America nung asayar yagi unforced errors 50 shi menaba ajanga Minaur ajangzüka liasü.

Maneni kasa asayamung nung taoba küm runner-up aser sixth seed Andrey Rublev-i, 6-7 (3/7), 7-6 (7/2), 3-0 agi Spain nung asayar Alejandro Davidovich Fokina kokogo, shiba temang nung timtem adokba ajanga asaya tembanga masayateti liasü.

Iba asaya akokba sülen Rublev quarterfinals nung Fritz den asayatsü.

BILEMDANGANG

"Tangar tia majungba nung nai kodanga tepela."